



# Nizar Najib jadi taruhan BN di Peramu Jaya

Oleh [Asrol Awang](#) - November 2, 2022 @ 12:37pm  
[bhnews@bh.com.my](mailto:bhnews@bh.com.my)

KUANTAN: Anak sulung kepada Datuk Seri Najib Razak, Mohamad Nizar, dipilih sebagai calon Barisan Nasional (BN) di kerusi Dewan Undangan Negeri (DUN) Peramu Jaya.

DUN Peramu Jaya adalah salah satu daripada DUN bawah Parlimen Pekan yang disandang bapanya sebelum ini.

Senarai 42 calon BN bagi bertanding DUN Pahang diumumkan oleh Pengerusi BN negeri, Datuk Seri Wan Rosdy Wan Ismail, sebentar tadi.

Penyandang kerusi Peramu Jaya, Datuk Seri Sh Mohmed Puzi Sh Ali, pula akan bertanding di Parlimen Pekan, kerusi yang disandang keluarga Najib selama 63 tahun sejak Perdana Menteri kedua, Allahyarham Tun Razak Hussein.

Menteri Besar Pahang, Datuk Seri Wan Rosdy Wan Ismail, pula akan mempertahankan kerusi DUN Jelai.

Pada PRU ini, BN Pahang akan bertanding 42 kerusi DUN Pahang dengan menampilkan 27 muka baharu bagi DUN, manakala lapan muka baharu pula daripada 14 calon Parlimen.

Daripada jumlah kerusi DUN itu, 34 kerusi ditandingi UMNO dan enam (MCA) bagi kerusi DUN, manakala 11 kerusi UMNO dan tiga kerusi MCA di Parlimen.

Bagaimanapun, dua calon bagi kerusi Sabai dan Cheka tidak diumumkan hari ini.

Wan Rosdy berkata, kombinasi muka baharu dan lama adalah ramuan yang strategik bagi memastikan kesinambungan inisiatif yang telah dirancang serta percambahan idea segar dan baharu.

Katanya, calon yang dibariskan adalah mewakili semua parti komponen berdasarkan persetujuan dan persefahaman yang jelas atas semangat dan muafakat BN.

"Tidak berlaku pergeseran atau masalah yang besar dalam merunding dan membahagikan kerusi antara parti komponen BN," katanya pada Majlis Pengumuman Calon BN Pahang di sini, " hari ini.

Hadir sama pada majlis pengumuman itu ialah Perdana Menteri, Datuk Seri Ismail Sabri Yaakob, yang juga calon Parlimen Bera

Bagi calon BN di 14 Parlimen Pahang, Parlimen Bera ditandingi Ismail Sabri , Datuk Ramli Mohd Noor (Cameron Highlands), Datuk Seri Abdul Rahman Mohamad (Lipis), Datuk Seri Hasan Ariffin (Rompin), Datuk Mohd Shahar Abdullah (Paya Besar) dan Datuk Seri Ismail Mohamed Said (Kuala Krau).

Kerusi Parlimen Pekan pula ditandingi penyandang kerusi DUN Peramu Jaya, Datuk Seri Sh Mohamed Puzi Sh Ahmad dan Datuk Seri Abdul Hamid Nazahar (Kuantan) dan Datuk Mohd Zukarmi Abu Bakar (Jerantut).

Pengumuman juga menyaksikan dua EXCO kerajaan negeri iaitu Datuk Seri Mohd Sharkar Shamsudin dan Datuk Seri Shahaniza Shamsudin masing-masing dipertaruhkan untuk bertanding di Temerloh dan Maran.

MCA pula mendapat tiga kerusi Parlimen iaitu Bentong yang bakal ditandingi oleh Tan Sri Liow Tiong Lai manakala kerusi Indera Mahkota akan ditandingi pegawai khas Presiden MCA, Datuk Quek Tai Seong dan Raub pula Setiausaha Agung MCA, Datuk Chong Sin Woon.

Pada PRU-14, BN Pahang memenangi sembilan daripada 14 Parlimen manakala kerusi DUN pula BN memenangi 25 daripada 42 kerusi.



Anak sulung bekas Perdana Menteri, Datuk Seri Najib Tun Razak, Datuk Mohamad Nizar Najib menyampaikan ucapan pada Taklimat Khas Presiden UMNO di WTC baru-baru ini.